



Kamis, 25 Juli 2024
Ogen: Yohanes 11:17-27



“Bicara Je Kam, Labo Mate Turangku”



Marta ras Maria erturang ras Lasarus, janah keleng kal ate Jesus nandangi kalak enda teluna. Lasarus lit i bas kondisi pinakiten, janah pinakitna e iberitaken Marta ras Maria man Jesus alu pengarapen gelahna Jesus reh ndahi ia teluna lako mpepalem pinakit turangna Lasarus. Mbelin kal pengarapen Marta ras Maria maka turangna malem arah pinakitna nari. Pengarapen gelah turangna madan, la mis kal isehken Jesus. Sabapna bas ayat 4 *"Penakit enda labo erkedungen i bas kematen; tapi pinakit enda jadi gelah terpuji Dibata, janah enda me jadi sada dalam gelah terpuji Anak Dibata"*. Sura-sura manusia la seri kap ras sura-sura Dibata. Kenca empat wari Lasarus ikuburken, reh Jesus ku Betani. Janah enterem rehen kalak i Jerusalem nari lako ngapuli Marta ras Maria. Tupung i begina berita maka Jesus nggo reh, ndarat Marta njumpai Jesus, jenari nina: *"O Tuhan, bicara jenda min ndai Kam, labo mate turangku e"*. Megogo dengen ceda kel ate Marta ras Maria i bas kelawesen turangna Lasarus, sebab Lasarus turangna e me kalak si ikelengi Jesus bage pe siikelengina. Perasaan megogo, kehilangan bage pe kearun ate Marta i bas kelawesen turangna mewakili kerina perasanta tupung kalak si ikelengi kita idilo Dibata; banci saja lit perasaan sideban siluar perasaan si telu e, misalna kebiaren. Mbiar kita kerna kegeluhen si bakal sidalani tupung kalak siikelengi kita idilo Dibata, seh maka menam-menam lanai kita ngidah kerna Kuasa ras keleng ate Dibata. Bicara je Kam, labo mate turangku. Kalimat enda ncidahken kearu ate rikut pe ras rasa kecewa-merawa. Megati kita pe bas posisi si e; rajin kel nge ia pelayanen engkai maka idilondu Tuhan, kitik denga kel anak-anakna, aku saja min leben, uga maka anakku si paksana kuliah ninta. Melala kel ungapen perasaan tupung Tuhan erdilo man kalak si keleng ateta. Marilah tetap siinget padan Tuhan, *"Aku kap simereken kegeluhen ras mpekeke kalak mate. Ise tek man bangKu, nggeluh me aminna gia nggo mate"*

📖 Dibata terpuji arah kematen kalak siikelengi kita